

խանորդն : Նուիրակապետն խնդրէր 'ի նախկին Դատաւորէն զվարձ ծառայութեան իւրոյ , եւ նա ոչ կամէր՝ իրր աղքատ և գիտնական , և 'ի բաղմանալ բանից և երթեւեկելոյ 'ի վանս Հայոց , Գաղաքապետն 'ի մէջ մտեալ՝ էտա զմի մասն 'ի Հայոց և զմնացեալն 'ի Յունաց և արձակեաց զնա : Իսկ նախկին Դատաւորն Մուսաննըֆ ձեռամբ Իբրաքապետի Դատարանի խնդրէր 'ի Հայոց զառաջին խոստացեալ գումարն ըստ մուրհակին եւ նոքա առաջի եղեալ զարարս նորին և զմեծամեծ փնասն , դարձուցին զնա յետս ունայն , և սահանջէին 'ի նմանէ զոր առեալ էր յառաջագոյն . և 'ի յայտնել նորա զխնդիրն նոր Դատաւորին , կոչեալ զՀայս ցուցանէ զմուրհակն և սահանջէ 'ի նոցանէ զամբողջ գումարն , և յընդդէմ՝ դատնալն Հայոց բաղմացան բանք յերկուց կողմանց , եւ ապա զիջեալ 'ի կամս նոր Դատաւորին ետուն նմա 10,000 դահեկան և առին 'ի նմանէ զմուրհակն , եւ Նուիրակապետն առեալ զնա տարաւ 'ի Կիպրոս յաքսոր : Այսպէս փտանգեցաւ Դատաւորն Երուսաղէմի Մուսաննըֆ յաղթեալ 'ի կրից եւ 'ի կամակոր բռնութենէ իւրմէ :

### Գ Լ Ո Ւ Խ Լ Գ .

Գործ նոր Դատաւորին՝ յամուութիւն և ազատութիւն նորին : Երկար վէճ ընդ Հայոց : Բանք Նուրի Էֆէնտեայ : Գալուստ նոր հրովարտակի : Ընթերցումն նորին յեկեղեցին Բեթղէմի :

**ՅԱՆՑԱՆԵԼ** 'ի գլուխ պաշտօնի իւրոյ նորոյ Դատաւորի մատեան առ նա Յոյնք իրրեւ նախածանօթ բարեկամ իւրեանց , և սկսան որսալ զմիտս նորին և խոստանալ նմա աւելի քան 200 քսակս դրամոց . զի պատճառանօք երկարեաց զգործն , մինչեւ մարթասցին գտանել հնարս կամ 'ի կոստանդինուպօլսոյ եւ կամ 'ի Կուսակալէն , յուչ առնելով նմա զառաջին բարերարութիւնս իւրեանց . ապա թէ ոչ՝ տալ տարադրել զինքն յանդարձ յօտարութիւն , որպէս Հայք ետուն աքսորել զնախորդն իւր : Սակայն